

Q. D. B. V.

DISSERTATIO MEDICA INAUGURALIS
DE

MODO OPE- RANDI REME- DIORUM PHYSI- CO-MECHANICO,

QVAM

PROPITIO NUMINE DIVINO,

PRÆSIDE

DN. FRIDERICO HOFFMANNO,

ACADEMIÆ h. t. PRO-RECTORE ET
COLLEGII MEDICI DECANO,

PRO GRADU DOCTORATUS

*Summisque in Medicina Honoribus & Privilegiis rite ac legitime
consequendis,*Publico ac placido Eruditorum Examini
subjicitM. JOHANNES GEORGIUS HERMANNUS,
Ploenensis Hofsatus,*ad diem II. Augusti M DCC XVIII. loco horisque consuetis.*

HALÆ MAGDEBURGICÆ,

Typis CHRISTOPH. ANDRÆ ZEITLERI, Acad. Typ.

MODO OPE
 RAMBI REVE
 DIGITAL
 COMPTON



DISSERTATIO MEDICA INAUGURALIS
DE
REMEDIORUM MODO OPE-
RANDI PHYSICO-MECHANICO.

PROOEMIUM.



Vicunque non empiricorum more, hoc est, temere & confuse, sed potius tuto, considerate & quadam cum certitudine in artis nostræ operibus versari, gravesque ægitudines vel præcavere vel à corpore humano amoliri studet, eum quam maxime quatuor tenere & observare oportet. Primo opus est, ut corporis afflicti naturam & indolem probe cognitam & perspectam habeat, utrum scilicet debile & infirmum, an robustum & validum sit, qualis solidorum æque ac fluidorum ad motum sit dispositio, & quæ generis nervosi cum actionibus animalibus, nec non viscerum, imprimis ventriculi, sit constitutio. Deinde morbi genius & causæ, earumque producta, quæ symptomata sunt, curate ac diligenter explorari debent. Tum remedia, quæ ab Hip-

pocrate instrumenta artificis, & à *Galeno* manus Dei auxiliatrices vocantur, ad unguem scire oportet, ut statim judicari possit, quænam remediorum genera removen-
dis his causis quam maxime sint accommodata. Deni-
que etiam methodus sive ordo, quo illa prudenter ap-
plicari debeant, inquirendus est. Hæc sunt præcipua
& palmaria requisita, quæ ad artem dextre & auspiciato
exercendam scitu sunt necessaria. Quum vero medi-
cus curas & cogitationes suas maxime in eo defixas ha-
bere debeat, ut auxiliante natura, quæ sola sæpius ac
sua sponte sine medici ope medetur, causas nocentes
à corpore propellat, (siquidem sanare nihil aliud est,
quam causas morborum per remedia adjuvante natura
opprimere) facile apparet, medico laborandum esse, ut
omnium remediorum vires ac proprietates plenius ac
perquisitius calleat. Ut enim recte docet *Galenus lib.V.
de Method. medicamentorum, inquit, facultates nosse medendi
methodum præcedit*; ita profecto dolendum est, multorum
simplicium remediorum, quibus quotidie utimur, veras
ac genuinas facultates maximam partem adhuc esse in-
cognitas & saltem inter paucissimos constare, quibus e-
lementis vel principiis suam in corpus nostrum opera-
tionem exequantur. Neque vero una, sed plures exi-
stunt causæ, quod genuinæ remediorum vires plurimis
obscuræ & incompertæ sint. Est primo ingens ac pe-
ne infinitus remediorum numerus, quibus medicorum
vulgus ad medendum utitur, quorum proprietates si-
gillarim nosse labor propemodum immensus foret. De-
inde rarius simplicia, pauca, selectiora, & quæ aliis virtu-
te præcellunt, sed potius ex ingenti farragine confarci-
nata, & sæpius inepte ac sine ullo delectu commixta in
usum

usum trahuntur, ubi certe singulorum facultates nulla ratione explorari possunt. Accedit, quod effectus, qui remediorum usum sequuntur, nimis plerumque præcipitanter ac temerarie ipsis ac solis remediis tribuant, qui tamen sæpius à natura vel morbi vehementia proficiscuntur. Quam vero arduum ac difficile sit effectus naturæ ac remediorum probe à se invicem distingvere, artis peritiores optime norunt. Perpauci etiam perpendunt, omnium remediorum vires maxime esse relativas, variisque conditionibus limitatas, non absolutas, neque unice à sphæra activitatis suæ, sed simul etiam, ut philosophi loqui amant, à modo receptivitatis sive, quod unum idemque est, à dispositione interna partium & naturæ auxilio dependere. Tandem rari apparent, qui remediorum elementa ac principia, quibus in corpus nostrum agunt, ibique mutationem inferunt, recte intelligunt, id quod præcipue ex ignorantia veræ ac solidioris theoriæ medicæ contingit, si nimirum mechanicæ, physicæ & chymicæ scientiæ non superstructa est. Dici enim vix potest, quas nugæ atque ineptias cum veteres tum nonnulli recentiorum, quos inter chymici & Cartesianæ sectæ addicti præcipue nominandi sunt, hac quidem in re explicanda proferre soleant. Quid enim est ineptius, quam ex qualitatibus calidis & frigidis, ex activitate totius substantiæ, ex speciali crassi, textura, syncrasia, vel cum chymicis ex mercurio, sulphure, spiritu, principio irradiativo, lumine remediorum facultates deducere. Neque recentiorum quorundam ex Cartesianâ philosophia desumpta placita ullius hac in re momenti sunt, dum ex varia particularum figura, situ, structu-

ra, contextu & materiæ ætheræ influxu vel effluxu operationes remediorum derivare volunt; quæ omnia utut penitus negari non possint, quoniam omnes effectus in universa natura à causis mere mechanicis ac proportionatis perficiuntur; sed tamen, quum nec sensibus obviæ sint, nec intellectui pateant, frustra allegantur ejusmodi principia, quæ jure ac merito inter occultas qualitates referuntur. Longe autem obscuriori via mihi incedere videntur, qui omnibus causis physicis externis in corpus nostrum motum, adeoque influxum, qui sine motu concipi non potest, penitus præscindunt, omnesque actiones, mutationes & motus interno cuidam agenti ac moventi principio, quocunque etiam nomine veniat, in acceptis ferunt. At vero qua ratione hoc admissio principio diversissimas remediorum, imo venenorum vires atque effectus, quos in corpora animantium exerunt, explicare eorumque rationem reddere velint, ego quidem non video. Neque hanc hypothesein ulterius hoc loco excutere instituti nostri permittit ratio, sed potius labor noster unice in eo occupatus erit, ut omnia remedia ad pauca genera certasque classes reducamus, simulque breviter & strictim ostendamus, hæc ipsa manifestis simplicissimis causis physicis suam exerere efficaciam, & naturam in sanationis negotio insigniter juvare posse. Quemadmodum enim paucissima dantur morborum genera, & causæ simplicissimæ, ita etiam perpaucae sunt vires & classes remediorum, quæ ad illos profligandos adhibentur. Atque hoc est, quod in præsentî dissertatione loco speciminis inauguralis præstare apud nos constituimus. Faxit Divinum numen, ut suscepti conatus in nomi-
nis

nis sui gloriam, generis humani salutem & artis nostræ incrementum feliciter & ex voto succedant.

§. I.



Vum medicus in profligandis morbis non alium scopum sibi præfixum habeat, quam ut motus morbosos tollat, vel materiam horum motuum opificem à corpore removeat, facile apparet, omnia remediorum genera ad duas potissimum classes reduci posse, quarum una ea complectitur, quæ motibus morbofis dicata sunt, altera vero ea continet, quæ causas eorum materiales maxime respiciunt. Quemadmodum enim materia, per quam nihil aliud, quam dispositionem corporis ad motum intelligimus, & ipse motus, qui est actio unius corporis in alterum, duo illa sunt universalia naturæ principia, à quibus omnis actio, omnis operatio & effectus in universa rerum natura occurrentes proficiscuntur, indeque rationali modo explicari debent: ita etiam motus & materia illa sunt medicinæ principia, ex quibus non modo vitæ, sanitatis, & conservationis corporis humani fundamentum, sed omnium quoque morborum indoles, causæ, eorumque sanatio & remediorum operationes derivari debent. Jam vero accuratiori facta consideratione deprehendimus, omnes, qui in morbis obvii sunt, motus optime in duas classes dispesci posse, videlicet ad motum solidorum æque ac fluidorum vel nimis auctum vel præter naturam imminutum. Hinc omnia remedia, quæ motibus morbofis in ordinem redigendis dicata sunt, vel debilem & languidum augere atque intendere,

re, vel enormem & nimis auctum compescere ac sedare debent. Illa commodissime roborantia, hæc vero sedativa appellari possunt. In pathologicis enim à nobis satis superque ad liquidum perductum est, omnis generis morbos uel motu solidorum aucto, quem Græci *σπασμὸν* vocant, vel imminuto, quem *ἀτονίαν* appellant, sua habere incunabula. Quum vero medici officium in eo versetur, & ipsa etiam artis nostræ definitio, quam antiquissimus medicinæ parens, *Hippocrates, Lib. de Flatibus* proponit, id exigat, ut quæ deficiunt, restituantur, & augeantur, & quæ abundant ac modum excedunt, temperentur ac detrahantur, quo motuum & humorum temperies, vitæ ac sanitati amicissima perpetuo conservetur, illud, opinor, in aprico est, duplicis generis dari remedia, quorum quædam spasmos sive universales, ut fit in febribus, sive particulares, qui certas tantummodo partes obsident, sedant & leniunt, quædam vero deperditum robur solidorum rufuscitant atque restitunt.

§. II.

Neque vero solum medico incumbit, motus vitæ ac sanitati adversos accommodatis remediis moderari, inque debitum temperamentum reducere, sed etiam eo ipsi respiciendum est, ut materiales causæ, morbosorum motuum effectrices, jugulentur, & a corpore propellantur. Quam ob rem sedulo & cum cura inquirere oportet, quotuplicis generis existant omnes morborum causæ, quibus cognitis cuilibet pronum erit dijudicare, quam apte, apposite & congruenter omnium quoque remediorum facultates in easdem classes distingui possint. Inter omnes autem,
qui

qui vel levissimam in arte salutari operam collocarunt, constare arbitramur, omnes morborum causas noxiæ aut qualitati aut quantitati esse assignandas, quarum utraque convenientia, & ab ipsa quasi natura huic scopo dicata remedia sibi vindicat. Quod enim quantitatem attinet, illud, opinor, in confesso est, ad vitæ & sanitatis conservationem non nisi definitam, certoq; pondere ac mensura circumscriptam fluidorum, quæ a solidorum impulsu reguntur, quantitatem esse necessariam, quæ si vel abundantia vel defectu à naturali statu defleat, varias corporis afflictiones progenerat. Quum itaque materiæ quantitas vel supra vel infra modum sit, hinc duplicis generis resultant remedia, quæ morbosam quantitatem respiciunt, & recepto in scholis loquendi more evacuantia ac replentia appellantur. Jam vero ex pathologicis satis superque notum est, hanc ipsam, quæ quantitate excedit, materiam ratione indolis & mixtionis suæ variam esse ac distinctam, & per diversa corporis emunctoria esse eliminandam. Atque hinc est, quod remedia, quæ ad morbosam hanc quantitatem educendam spectant, in varias classes disponi possint. Et hæc sunt vomitoria, laxantia, purgantia, diaphoretica, sudorifera, diuretica, salivantia, errhina ac sternutatoria, quorum quælibet noxiam quantitatem pro diverso ejus respectu per idonea emunctoria evacuant. Longe aliter autem se res habet, si materiæ quantitas in defectu peccat, sique laudabiles, & qui corpori nutritionem, robur ac vires suppeditant, humores deficiunt. Quis enim non videt, hic ea in usum vocanda esse, quæ fractum corporis robur instaurant, ac detractos humores resarciunt. Atque huc referenda est universa clas-

B

replen-

replentium, qua continentur nutritiva & analeptica, quorum omnium effectus ad vires reparandas & laudabiles succos ingenerandos collineat.

§. III.

Supra dictum est, corporis nostri passiones non modo à noxia materiæ quantitate, sed ab ejus quoque depravata & naturæ inimica qualitate suam trahere originem. Hinc illud emergit genus remediorum, quæ depravatæ qualitatis emendationi inserviunt. Quemadmodum vero non una est exsuperantis materiæ indoles, quæ per diversa emunctoria ejici & exturbari debet: ita etiam variæ dantur nocentium humorum intemperies & qualitates, quarum quævis peculiaria & appropriata remedia desiderat. Quot igitur pravis humorum qualitatibus corpus obnoxium est, tot etiam classes remediorum, quæ ad illarum emendationem spectant, constituendæ sunt. Si enim corpus nimia laborat succorum crassitie, sub qua omnis generis humores tardius per vasa feruntur, locum obtinent diluentia, quæ materiam ad motum ineptam mobilem reddunt, & spissis humoribus debitam fluiditatem conciliant. Si tenax & glutinosa materia in tenuissimorum vasorum angustis fixa atque impacta hæret, & succedentibus a tergo humoribus viam præcludit, operam ac præsidium ferunt aperientia, quæ obstructions referant, & incarceratos humores vasis excutiunt. Ubi vero universa sanguinis massa acrimoniam induit, quæ fibras stimulando & convellendo infesta est, tunc auxilium expectari debet ab emollientibus, quæ acrimoniam leniendo solamen ferunt. Ad acidos porro, & corrosivos humores corrigendos faciunt absorbentia, quæ

quæ acidum primis præsertim viis infensum infringunt, & nimiam acredinem egregie temperant. Ad refrænandam denique calidam & biliosam qualitatem, quæ sanguinem & humores in præternaturalem motum conjicit, maxime accommodata sunt præcipitantia & refrigerantia, quæ nimium æstum restinguunt, & molestas ebullitiones sufflaminant.

§. IV.

Constitutis sic summis remediorum generibus, quæ partim morbosos motus, partim quantitate vel qualitate nocentem materiam respiciunt, ordinis ratio nobis imperat, ut ad priorem classem revertamur, & paulo pensiculatiùs inquiramus illa agendi principia, quibus remedia, quæ perversis motibus medentur, instructa sunt. Atque hic primo omnium consideranda veniunt roborantia, quorum classe ea comprehenduntur, quæ fibris elasticis tam carneis quam nervosis vim, robur, ac movendi potentiam fœnerant, quæ naturalem earum motum tuentur, vel nimis languentem ac depressum excitant atque erigunt. Quæ ratione non modo vitalium humorum circuitum juvant, & militantes pro sanitate excretiones cum necessariis secretionibus promovent, sed etiam aucto fibrarum tono impediunt, quo minus periculosa humorum stases vel stagnationes progengerentur. Quum autem ex physiologicis cognitum ac perspectum sit, omnes motus, qui in corpore humano celebrantur, partim a fibrarum elatere, partim a sufficiente generosi & subtilissimi sanguinis ac fluidi ex cerebro & nervis influxu gubernari, inde ex facili apparet ratio, quare hujus generis remedia maxime in solidas partes ope-

rentur, & quare ita esse debeant comparata, ut solidorum augeant elaterem, & majorem temperati ac spirituosæ sanguinis influxum procurent. Prout igitur partes, quæ roboratione egent, a se invicem differunt, ita veteres his remediis pro diverso roborandæ partis respectu nomina quoque diversa imposuerunt. Si enim capiti robur conciliandum erat, accommodata huic scopo remedia vocabant cephalica, si debilitatum nervorum genus firmandum, nervina, si stomacho vigor excitandus, stomachica, si hepar roborandum, hepatica, si lienis debilitati succurrendum, splenetica, si dejectus intestinorum tonus restituendus, carminativa, si uterus fulciendus, uterina, si denique universa partium fibrosarum compages ad motum erigenda erat, ac totius corporis vires instaurandæ, tonica, confortantia & cordialia solebant appellare. Sed venia hac in re concedenda est veteribus, qui humorum circuitus ignari tot tamque diversas roborantium species excogitarunt. Persuadebat enim ipsis ætatis suæ simplicitas, ut firmiter statuerent, certa remedia certis tantummodo partibus dicata esse, neque unum idemque remedium per omnes corporis partes suam disperiri posse efficaciam. Nos vero invento humorum circuitu longe meliora edocti, omnes has, quæ a rei anatomice inscitia profluxerunt, distinctiones nullo prorsus in numero habemus, easque velut vanas persuasiones in totum rejicimus. Quum enim nostris temporibus fide satis liquenti constet, omnem humorum massam per universum corporis ambitum jugi ac perenni motu circumvolvi, eandemque sanguinis guttam, quæ modo per vasa capitis ferebatur, brevi post
etiam

etiam ad extremos pedum digitos penetrare, jam, puto, in aprico est, omne remediorum genus sanguini associatum per universas corporis partes virtutem suam diffundere, adeo, ut idem remedium, quod capiti fuit præsidio, etiam utero, licet ab eo sit remotissimus, auxilium præstare possit.

§. V.

Instructa igitur sunt roborantia principio partim salino volatili, & acri sulphureo, partim terreo subadstringente, quorum utrumque ejusmodi est, ut eo ad partes roborandas nihil sit accommodatius. Sulphur enim illud subtilissimum & sal volatile, quo roborantia pollent, non modo sanguinem & humores expandunt, & majorem eorum affluxum ad partes invitant, sed etiam fibras blanda irritatione ad constrictionem cient. Accedit deinde elementum terreum & adstringens, quod fibrarum humiditatem imbibendo, poros coarctat, & hac ratione compagem fibrarum tensiorem reddit. Prout vero principium hoc salino sulphureum cum terreo subadstringente elemento variam init societatem, varia etiam exurgit roborantium textura, a qua diversus eorum sapor, diversaque operatio derivanda est. Operantur enim roborantia primo oleo quodam subtili balsamico & resinoso, paulo tamen temperatiori, partibusque gummosis ac terrestribus immerso. Et hic classem ducunt ex gummatibus mastix, thus, succinum, myrrha, ladanum, olibanum, benzoe, storax & tacamahaca. Ex lignis huc referenda sunt lignum aloes, sassafras cum ejus cortice, santalum citrinum. Ex balsamicis hunc censum subeunt balsamum de Copaiva, de Tolu, Peru-

ruvianum, quibus tamen omnibus ambra virtute antecellit. Deinde agunt quædam roborantia oleo subtili & fragrante, particulis terreis permixto, quo præcipue ex vegetabilibus gaudent melissa, mentha, origanum, serpillum, thymus, origanum creticum, flores lavendulæ, spicæ, majorana, rosmarinum, mentha saracenica, omnesque sic dictæ herbæ cephalicæ, quæ igni commissæ oleum fundunt subtile & fragrantissimum, cujus ope suam maxime præstant efficaciam. Hunc quoque in numerum ex aromatibus cinnamomum, nucista, macis, caryophylli, cubebæ, cardamomum transferenda sunt. Sunt vero quædam ex roborantibus, quæ oleo valde subtili puro æthereo & fragrante suam perficiunt operationem. Et huc pertinent ex præparatis & compositis olea destillata, ut cinamomi, nucistæ, macis, caryophyllorum, cubebæ, cardamomi, menthæ, melissæ, rosmarini, majoranæ, lavendulæ, calami aromatici, serpilli, chamomillæ Romanæ, essentia succini, spiritus balsami Peruviani, spiritus succini & mastiches bene destillatus, essentia cinamomi, balsamum apoplecticum, balsamum nostrum sic dictum vitæ, & varia elixiria stomachica, ut Michaëlis, elixir vitæ Mynsichti, balsamum embryonum & omnis generis salia volatilia oleosa. His merito etiam accensenda est camphora, quæ nihil aliud est, quam oleum subtile, sed coagulatum, cujus virtus, in quacunque etiam forma exhibeatur, in roborandis partibus vix satis digne deprædicari potest.

§. VI.

Altera roborantium species est, quæ principio gaudet subadstringente & simul amaricante, particulis
pau-

paucioribus balsamicis interspersis, quo in numero maxime sunt radix caryophyllatæ & aristolochiæ, cortex chinæ, chacharillæ, tamarisci, capparum, fraxini, succus catechu, quorum virtus in debellandis intermittentium paroxyfmis est spectatissima. Quod quidem non alia ratione præstant, nisi quod membrana-
ceas partes, ab hostili materia in molestas constrictiones laceffit, vi sua subadstringente corroborent, & ita impedian, quo minus acris & inimicus humor, qui maxime primis in viis stabulatur, has partes ad præternaturales contractiones irritare possit. Accedit & hoc, in quo plurimum momenti situm est, quod hujus generis roborantia particulis suis amaricantibus crassos & viscidos humores incidant, vasorum obstructions recludent, & hac ratione impeditum sanguinis & humorum circuitum faciant liberiores. Ad hanc vero roborantium classem merito accedunt ea, quorum mixtionem principum terreum, amaricans, terebinthinæ æmulum ingreditur. Hæc maxime virtutem obtinent vulnerariam, & partium læsarum consolidationi egregie patrocinantur. Siquidem non modo feri superflui, quod consolidationi adversatur, excretiones promovent, sed etiam vi sua balsamica & adstringente laceratis partibus suam & integritatem & pristinum robur restituunt. Hæc maximam partem regnum vegetabile nobis suppeditat, inter quæ præcipue eminent veronica, scolopendrium, pyrola, hypericum, millefolium, capillus veneris, marrubium, scabiosa, chamædrys, agrimonia, pulmonaria maculosa, chamæpytis, urtica mortua, consolida saracenica, hepatica, fanicula, betonica, artemisia rubra, melissa, flores
roris-

rorismarini, & chamomillæ vulgaris, quorum virtus in decoctis & extractis est laudatissima.

§. VII.

Roborandi etiam eximia facultate pollent nonnulla ex mineralium regno petita, quæ sulphure inflammabili cum partibus terreis subtilioribus mixto constant, ut ferrum ejusque limatura in tenuissimum pulverem redacta, & puriores mineræ martiales, sicut est hæmatites, qui dum ignem nondum expertus est, copioso adhuc sulphure metallico scatet, & in roborandis relaxatis visceribus medicamentis ex auro desumptis longe est superior. Ejus flores cum sale ammoniaco parati tenuiores ab hæmatite separatas sulphureas partes complectuntur, hinc non modo elegantem croceum colorem, sed etiam fragrantissimum odorem præferunt, quibus spiritus vini rectificatissimus superfusus, partem sulphuream extrahendo, essentiam mineralem tonicam & roborantem egregiam constituit, cujus usus profecto omnes essentias solares & alia arcana tantopere celebrata chymica longissime exuperat. Splendet etiam ejusmodi virtute roborante sulphur vulgare, purissimum tamen & stillatitium, vel si impurius est, in flores sublimatum, quod prudenter applicatum virtutem purificantem, diaphoreticam, discutientem non alia ratione exercet, quam quod partibus ac visceribus a tono dejectis robur ac tonum restituat. Ad roborantia, quæ fixiori terreo ac tenuiori argillaceo unctuosissimo principio agunt, spectant ossa, cornua & dentes animantium coctione & evaporatione emollita & in pulverem redacta, cujus generis sunt cornu cervi, ebur, unicornu animale, ungula alcis, dens hippopotami

tami, rhinocerotis, lapis manati, philosophice præparata; it. unicornu fossile, terræ sigillatæ, bolus Armeniæ. Ex mineralibus crystallus & omnes gemmæ præparatæ. Ex animalibus lapis bezoar orientalis & occidentalis, & ex compositis huc referri debent pulveres sic dicti bezoardici & cordiales, ut *Sennerti*, *Ludovici*, *Dorncreulii*, lapis de Goa, pulvis bezoardicus Anglicanus ex globulis. Monendum vero hoc loco duximus, ad roborantium classem minus recte referri debere adstringentia, stiptica, ex principio terrestriori & acido invicem combinata, quæ fibras nimium constringendo, poros concludendo, & fluxiles humores incrassando, vitalium humorum progressui valde inimica sunt; quare eorum internus usus, tanquam structuræ animali infensissimus, ex praxi medica jure meritoque relegandus est. Horum in numero sunt radix tormentillæ, bistortæ, cortices granatorum, flores balauftiorum, rosarum rubrarum, nux cupressa, alumen, vitriolum, caput mortuum vitrioli, & omnes tincturæ martis adstringentes cum menstruo acido fixiori paratæ, liquor martialis ex capite mortuo florum salis ammoniaci martialium resultans, pulveres stiptici, quorum usus non alius, nisi interdum externus esse poterit.

§. VIII.

Consideratis itaque iis auxiliiorum generibus, quæ motum, tonum ac robur partibus solidis ac fluidis reddunt, & magnam in sanando & sanitate tuenda promittunt efficaciam, sequitur jam, ut ad ea deveniamus, quæ nimis effrænes & validiores solidorum & fluidorum motus ac impetus componunt, eosque pacatiores reddunt. Et hæc non inepte vocari solent in genere sedativa, quo-

C

rum

rum quædam, dum spasticas solidorum contractiones solvunt, antispasmodica, quædam, dum simul dolores levant, anodyna vocantur. Quorum remediorum amplissimus etiam patet usus, siquæ ulla polychresta & universalia sunt, & quæ multis in curando indicationibus satisfaciunt, certe sedativa sunt, quorum in convulsivis & epilepticis commotionibus, in atrocioribus doloribus levandis, vel nimis excretionibus sistendis, iisdemque ex spasmo suppressis restituendis magna & excellens est efficacia. Quemadmodum autem principio, quo agunt, non uno eodemque, sed paulisper diverso instructa sunt, ita etiam quodammodo differentem producunt effectum.

§. IX.

In genere vero sedativa & quæ motus nimios moderantur, agunt principio quodam vaporoso five evaporabili sulphureo, idque vel naturæ maxime blandum atque amicum est, & fragrantem ac suaveolentem odorem exhibet. Quo pertinent ex vegetabilibus maxime flores, ut rosmarini, acaciæ, ulmariae, liliorum alborum, salviæ, hormini, fraxinellæ, chamomillæ, tiliæ, croci, auranteorum; ex herbis basilicum, mentha, horminum, salvia, ex aromatibus cortices citri, auranteorum, macis, nucistæ, & eorum olea, cortex thymiamatis, ex seminibus sem. anisi, foeniculi, nuclei cerasorum, persicorum, prunorum, amygdalarum amararum; qui cum aqua ex vesica destillati exhibent aquas egregii saporis & odoris: ex animantibus moschus & zibethum, ex marinis ambra, ex mineralibus spiritus nitri, vitrioli, salis dulcificati & præparati, liquor noster mineralis anodynus, ex oleis destillatis oleum de cedro, menthæ, basilici, cha-

chamomillæ verum, millefolii, quæ omnia blanda sua anathymiasi discursivum ac tumultuarium fluidi nervei motum componendi eximia virtute prædita sunt, neque vires, ut alia graveolentia, deprimunt, sed potius erigunt. Quod vero in genus nervosum ejusque fluidum hæc ipsa primario suam potentiam exerant, vel ex eo abunde comparet, quod in quibusdam, præsertim fœminis, imbecillioris & sensibilibioris naturæ, & ad paroxysmos hystericos proclivibus, motus illos spasticos non imminuant, sed potius exacerbent.

§. X.

Vel nonnulla ex sedativis sulphure vaporoso, graveolenti, naturæ non adeo amico vel blando motus, dolores & spasmos sistunt. In horum numero præcipuum locum habent papaveracea, & omnia ex iis desumta simplicia & composita, ut flores papaveris hortensis & rhæados, eorum essentia, extracta, aquæ destillatæ, syrupi, semina papaveris & oleum ex illis expressum, maxime omnium vero eorum lacryma, si-ve gummi resinofum, quod opii nomine venit, quod vario modo correctum & compositum copiosa & magni usus remedia medentibus præbuit. Inter quæ præcipua sunt theriaca *Andromachi*, mithridatium, theriaca cœlestis, aqua theriacalis cum & sine vino, essentia theriacalis, diascordium *Fracastorii*, laudanum cydoniatum per fermentationem paratum *Helmontii*, laudanum *Sydenhamii*, massa pilularum de styrace, *Starckii*, *Wildegansii*. Ex vegetabilium familia huc trahi debet pœonia planta, ex qua desumti flores, radices, aquæ destillatæ, syrupi, extracta, & ex compositis pulvis *Marchionis*, sua laude in sedandis spasmodis non debent de-

fraudari. Ex regno vero animantium ex eodem principio & elemento agunt & spasticas nervosarum partium contractiones sistunt lumbrici terrestres, castoreum, testiculi equini, secundina humana, intestina lupi, sanguis asininus, spinæ, hepata & corda viperarum, anguillarum, ranarum exsiccata & in pulverem redacta. Ita etiam sola rasura ossium, v. g. cranii humani, ungulæ alcis, lapidis manati, dentis hippopotami, medulla ossium cornu cervi; ex compositis aquæ typhorum cornu cervi, picarum, hirundinum, peculiari antispasmodica facultate pollent, unde específicos & secretos pulveres antepilepticos tanquam basis ingrediuntur. Neque eorum virtus in spasmodis delinendis, modo dextre adhibeantur, suo usu ac laude destituitur.

§. XI.

Vel sedativa agunt principio quodam pingui oleoso & vaporoso, constrictas nervosas partes demulcente & relaxante, ac potissimum usu externo juvant. Hujus generis sunt pinguedines & axungia animantium, v. g. humana, canina, vulpis, taxi, cati silvestris, viperarum, ursi, equina. Quo etiam pertinent viscera ex animantibus vivis desumpta, ut pulmo, hepar, omentum, ex bobus, vervecibus, agnis, item columbæ vel gallinæ in medium dissectæ, quibus dolentes & spasmo afflictæ partes foveantur.

§. XII.

Cæterum inter valentiora, quæ potius stupefaciendi & motus penitus sistendi, quam levandi ac sedandi facultate gaudent, & rarius usurpari debent, numeranda sunt narcotica, quæ ejusmodi principio vaporoso

roso sulphureo instructa sunt, quod tenuissimum & mobilissimum illud sanguinis & nervorum fluidum proxime & immediate afficiendo ejus naturam & crasin contaminat, ejusque laudabilem motum atque influxum extinguit: cujus indolis sunt omnia, quæ ex hyoscyamo, mandragora, stramonio, datura, corona imperiali & ejus speciebus desumuntur. Ex compositis unguentum narcoticum *Valerii Cordi*, trochisci narcotici *Plateri* eminent. Paulo autem mitioris naturæ sunt massa pillularum de cynoglossa & oleum hyoscyami expressum vel destillatione rectificatum. Horum omnium usus in medendo cautissimus esse debet, quia infirmos, senes & morbis acutis oppressos facile necant, dum inflammationes in sphacelum convertunt, capiti stuporem ac dementiam inducunt, vires frangunt, & conservationi vitali necessarias excretiones vehementer sufflaminant.

§. XIII.

Pertractavimus hætenus ea remedia, quæ perturbatis motibus in ordinem redigendis inserviunt. Nunc ordinem rei sequuturi contemplationem nostram ad ea transferemus, quæ nocentis materiæ emendationi velificantur. Hæc in medicorum scholis temperantia vel alterantia vocantur, quoniam intemperatos fucos corrigunt, & humoribus noxia qualitate imbutis naturalem temperiem restitunt. Quemadmodum vero, ut ex superibus patet, non uno habitu incedit depravata humorum qualitas: Ita etiam huic opponenda remedia in diversas classes abeant necesse est. Est enim primo acida & corrosiva humorum intemperies, quæ plurimis in morbis accusanda venit, nec aliis re-

mediis debellari potest, quæ quæ acidum hoc destruunt, & vulgo absorbentia appellantur. Horum virtus & efficacia unice derivanda est a principio terreo alcalino, quo mediante corrodentis acidi aculeos retundunt, & universam humorum in primis viis massam edulcorant. Atque in his classem ducunt terrea ac testacea, ut conchæ, ostreæ, cochleæ, perlæ, mater perlarum, os sepiæ, corallia, lapides ac testæ cancerorum; ex animalibus dentes & cornua usta, ut cornu cervi & eburustum, cochleæ ustæ, viperæ & cancri usti, dens apri, hippopotami philosophice præparatus, unicornu: ex volatilibus omnes ovorum testæ; ex mineralibus, margas, creta, unicornu fossile, limatura martis; ex piscibus mandibulæ lucii piscis, lapides percarum & carpiorum. Hæc recensita remedia amplissimi usus sunt in praxi medicæ, quæ iis haud facile carere potest. Est enim acidum, quod maxime primis in viis oberrat, multarum corporis passionum causa, ad quod statim prima in corporis regione invertendum, antequam ad ipsum sanguinem & reliquos humores transeat, hujus generis remedia cum insigni fructu adhibentur.

§. XIV.

Deinde intemperies datur sulphurea, calida & volatilis, quæ maxime regnat in febribus, quas excessivus calor, sitis, vigilia & virium consumptio comitantur. Hæc perversa humorum qualitas remedia flagitat sic dicta præcipitantia ac refrigerantia, quæ sanguinis incendium restinguunt, & ferventes præternaturali calore humores moderantur. Præstant hoc præ aliis ea, quæ sua in mixtione alunt principium subadstringens acidum, quo pollent ex vegetabilibus succus

cus citri, berberum, ribium, cerasorum, acetosæ, fragorum, acetosellæ, & omnes paratæ ex iis aquæ ac syrupi. Faciunt huc quoque acetum, vinum purum, præcipue Rhenanum ac Mosellanum, spiritus nitri ac vitrioli bene rectificati, tincturæ rosarum & papaveris cum spiritibus paratæ, item clystus antimonii sulphuratus. Neque hoc loco prætereundum est nitrum purum & ex eo arte paratus lapis prunellæ, cujus virtus in temperanda sulphurea humorum qualitate prorsus egregia est. Hæc remedia maxime febribus sanandis dicata sunt, & quoniam partim nimium calorem refræ-
nando, partim etiam spasmos leniendo sitim alleviant, hinc merito quoque sitim sedantia appellantur.

§. XV.

Progredimur nunc ad illam intemperiem, quæ particulis acribus causticis, nerveas partes graviter vellicantibus debetur. Atque in hac emendanda locum obtinent emollientia, quæ blanda mucilagine aerium particularum spicula oblinunt, & involucro quasi circumdato impediunt, quo minus fibras exquisito sensu præditas ad spasmos lacerare, vel hostili rosione lacerare possint. Hac emolliendi virtute splendent ex vegetabilibus radices althææ, liliorum alborum, consolidæ majoris, rapæ exsiccata, herba althææ malvæ, millefolii, flores chamomillæ vulgaris, liliorum alborum, croci, melilotti, sambuci, verbasci, semen lini & foeni græci. Vel operantur emollientia principio pingui & oleoso, quali instructæ sunt animantium pinguedines & axungia, ut axungia taxi, vulpis, canis, equi, hominis, medulla ossium vituli, pinguedo caponis; ex vegetabilibus oleum amygdala-

dalarum dulcium, oleum liliorum alborum, olivarum, aneti, chamomillæ, femina quatuor frigida majora, semen papaveris, nuclei pini & persicorum. Vel agunt principio terreo pingui & unctuofo, quale reperitur in omnibus margis, bolis ac terris figillatis, & ex parte etiam in antimonio diaphoretico. Vel denique suam operationem præstant substantia terrestri ac viscida, quam in se reconditam habent dactyli, ficus, mel, passulæ, saccharum lactis, cremor lactis, & omnium denique lac animantium, cui insignis inest acrimoniam temperandi ac permulcendi efficacia. Hæc remedia non modo interne in venenis causticis & corrosivis humoribus corrigendis egregiam opem ferunt, sed etiam externe cum fructu usurpantur, siquidem suppurationem promovent, fibras spasmo vel ariditate contractas emolliunt, & ab humorum acrimonia oriundos dolores insigniter levant.

§. XVI.

Ex iis, quæ crassos viscidos humores, tubulis viscerum inhærentes, resolvunt, præter superius recensita roborantia præcipuum locum obtinent vulgo sic dicta incidentia & aperientia, quæ non alio modo obstructa & infarcta vasa referant, quam quod solidorum motum & contractionem promoveant, quo fit, ut fluidorum motus celerior & citatior stagnantes humores dissolvat. Ex universa vero aperientium classe omnibus aliis palmam dubiam reddunt salia, quæ aciebus ac spiculis suis acrioribus fibras ad motum & contractionem intensiorem armant, ac delassatis vigorem suum restituunt. Hæc vero varii sunt generis: vel enim summe volatili urinoso principio id præstant, ut sunt spiritus salis ammoniaci

moniaci cum aqua vel etiam spiritu vini destillatus. Vel sale operantur volatili oleoso, quo spectant herbae sic dictae antiscorbuticae, cochlearia, nasturtium Indicum, hortense, aquaticum, trifolium fibrinum, becabunga, sedum minus, sinapi, radix armoraciae. Vel sale agunt puro alcalino fixo, quo instructa sunt omnia salia vegetabilium per incinerationem parata; ex mediis terra foliata tartari, tartarus tartarifatus, tartarus vitriolatus, arcanum duplicatum, nitrum antimoniatum, sal digestivum *Sylvii*, sal ammoniacum, sal *Glauberianum*, sal Epsomienſe & salia ex fontibus medicatis parata, praesertim sal fontium Egranorum, quorum singulorum magna & quasi universalis in re medica est utilitas.

§. XVII.

Ex aperientium vero classe omnibus palmam praeripiunt aquae sic dictae minerales medicatae, atque inter has maxime eae, quae acidularum ac thermarum nomine veniunt, quarum virtus in aperiendis obstructis visceribus, & crassis viscidis humoribus incidendis ac resolvendis, omnium, quae in praxi nota sunt, remediorum facultates longissime exsuperat. Quare etiam non sine magno fructu ad chronicas passiones avertendas, quae ut plurimum a veteribus & rebellibus vasorum obstructionibus foveantur, eorum usus est celebratissimus. Eorum vero modus operandi non alius est, quam quod partim copia aquarum diluant ac dissolvant humorum crassitiem, partim etiam stimulo, quem praestant salia, quibus imbutae sunt, vasa ad vegetiorem motum, contractionem & impulsum animant. Elementum enim illud activum minerale, quo

ab aqua pura hi fontes medicati differunt, tantummodo est salinæ indolis. Siquidem vel subtiliori & purissimo vitriolico sali, vel etiam alcalino fixo aut neutro omnes suas, quas possident, vires acceptas ferre debent.

§. XVIII.

Vel aperientia agunt sale quodam acri sulphureo resinoso, quo languidas fibras stimulant, & stagnantium humorum progressum accelerant. Ad quorum classem ex vegetabilibus præcipua illa gummata resinosa, ut gummi ammoniacum, galbanum, sagapenum, bdellium, benzoe, ex lignis quajacum, sassafra, lignum aloes, lignum Rhodii, ex radicibus radix pimpinellæ, lapathi acuti, levistici, sassaparillæ, ex arboribus strobili pini, abietis, referri debent, quæ si decenti modo in aqua decoquantur, & debite usurpentur, obstructions aperiendo & liberiores humoribus motum & excretionem fœnerando, sanguinis & humorum massam a multis excrementitiis sordibus depurant, & magna in debellandis chronicis passionibus præstant.

§. XIX.

Neque in aperientium familia ultimum locum sibi vindicant amara, ut absinthium, carduus benedictus, fumaria, scabiosa, scordium, trifolium fibrinum, flores chamomillæ, liliorum convallium, quorum extracta copioso sale sic dicto essentiali, quod naturam terræ foliatæ tartari habet, atque alcalinum & incidentem effectum præstat, & in aere humido facile colliquescit, imbuta sunt, quo & stimulando & colliquando acidos viscidos humores in morbis ab obstructione

ortis

ortis, præsertim usu continuato, virtutes possident nobilissimas.

§. XX.

Inter activiora aperientia ex mineralibus reponi merito ea debent, quæ mercuriali principio, quod in tenuissimas solidissimas agilissimæ tamen indolis particulas facile dissolvitur, suas dotes debent, quo minimos partium solidarum poros penetrando vascula ad validiorem contractionem & humorum impulsum potenter stimulant. Quo effectusplendent varia ex mercurio præparata, ut mercurius dulcis, mercurius diaphoreticus jovialis, item noster fixus diaphoreticus, arcanum corallinum, mercurius præcipitatus albus cum foliis auri tritus, & ex tutioribus, quæ simul connubio sulphuris mineralis quodammodo cicurata sunt, æthiops mineralis, cinnabaris antimonii et nativa.

§. XXI.

Perspectis itaque iis, quæ intemperatos humores corrigunt, immobiles viscidos fluxiles et mobiles reddunt, adeoque ad excretiones & secretiones idoneos efficiunt, sequitur jam, ut ad evacuantia nos transferamus, quæ præter naturam exundantes humores & ad exitum jam præparatos per omnis generis emunctoria educunt. Hæc prout materia evacuanda variat, vel etiam emunctoria, per quæ excretio fit, varia fortuntur nomina. Quæ enim biliosam saburram ex ventriculo & primis intestinis educunt, vocantur emetica, quæ sordes ex universo intestinorum canali blande evēhunt, lenientia sive laxativa, quæ vero validius operantur & nimias serositates etiam ex habitu corporis per intestina exturbant, purgantia audiunt. Deinde sunt

hæc in classe remedia, quæ vel blandius vel vehementius transpirationem movent, quorum illa diaphoretica, hæc sudorifera appellantur. Quæ autem urinarios renum tubulos ad motum sollicitant, & majorem feri salis secretionem efficiunt, nominantur diuretica, quæ lympham commovent, eamque per glandulas salivales ejiciunt, salivantia, & quæ denique mucum ex naribus proliciunt, ea sub errhinorum & sternutatoriorum nomine in medendo adhibentur.

§. XXII.

Dicendum est primo de emeticis, quorum operandi modus quærendus est in principio subtili volatili acri caustico, quo nervosas ventriculi & duodeni tunicas ad ejiciendam nocentis materiæ colluviem exstimulant. Atque ejusmodi elemento agunt ex vegetabilibus radices asari & ipecacuanhæ, quæ simul aliquid aromatici in se reconditum habent; ex mineralibus eodem principio operantur mercurius vitæ rite paratus, pulvis *Munckii*, crocus metallorum & ex eo paratus tartarus emeticus *Mynsichti*; aqua benedicta *Rulandi*, syrupus emeticus dispensatorii Brandenburgici, aqua nostra vitæ emetica, panacea *Glauberiana*, quæ nihil aliud est, quam sulphur auratum antimonii cum solutione tartari præcipitatum. Vel operantur emetica sale quodam metallico venereo, quo maxime pollent vitriolum album, vitriolum cyprium, & ex præparatis tinctura veneris *Helvetii*. Omnia enim vitriolacea, ut ex chymicis rationibus & diuturniori usu perspectum est, per se stimulandi virtute carent, sed tum demum hanc vomitum proritandi facultatem induunt, si cum venereis connubium inierunt. Nam omnia, quorum mixtionem venus ingreditur, vim emeticam obtinent.

§. XXIII.

Quod laxantia attinet, quæ vitiosam saburram intra primas vias collectam blande evacuant, eorum virtus unice à stimulo salino leniori derivanda est. Quum vero salinum hoc principium etiam alias, quæ ejus texturam ingrediuntur, particulas sibi admixtas habeat, facile perspicitur ratio, quare laxantia diversam inter se naturam, saporem & vires obtineant. Ita enim in cassia, manna & polypodio acre hoc sal conjunctum est cum dulci & mucilaginoso elemento: in rhabarbaro cum amaro terrestri; in aloe cum amaro & gummoso principio; in tamarindis cum acida & tartarea substantia, in agarico & foliis fennæ cum terra quadantevis viscosa, in floribus denique violarum, persicorum, acaciæ & semine violarum cum mucilagine subtiliori. Atque hinc est, quod hujus generis remedia non quibuslibet humoribus evacuandis accommodata sint, sed quædam saltem quibusdam conveniant, quæ tanquam specifica usurpari possunt. Sic in pectoris affectibus manna & polypodium egregiam nec ab ullo alio laxante expectandam opem præstant: cassia renibus dicata est; in sanguine depurando aliis præcellit polypodium: in sanandis hepatis & intestinorum vitiis, inque temperanda biliosa humorum qualitate reliquis merito anteponitur rhabarbarum, in capitis vero morbis agaricus & folia fennæ cum fructu insigni adhibentur.

§. XXIV.

Ex laxantibus vero compositis maxime commendanda sunt aqua laxativa Viennensis, extractum rhabarbari, elixir proprietatis purgans cum rhabarbaro & arcano tartari paratum, pilulæ aloëticæ Francofurtenses,

Glassianæ, tartareæ *Schræderi*, *Becheri*, & ad harum imitationem factæ *Hermannianæ*, *Stahlianæ*, nostræ; Syrupus cichorei cum rhabarbaro, roob tamarindorum, syrupus de manna solutivus cum extracto rhabarbari exaltatus. Hæc mitiora laxantia, quoniam non nisi lenissimo stimulo superfluos & intemperatos humores educunt, summo jure ac merito anteferenda sunt fortioribus illis ac drastice purgantibus, quæ caustico, quasi principio instructa ventriculi & intestinorum membranas vehementer exagitant, eorumque tonum graviter lædunt. Neque vero à clementiorum laxantium classe excludenda sunt varii generis salia, quorum usus in alvo cito ac tuto movenda esse debet commendatissimus. Talia sunt ex acidis cremor tartari, tartarus crudus, ex alcalinis sal tartari, sal thermarum Carolinarum; ex mediis tartarus vitriolatus, arcanum duplicatum, sal Glauberianum, Egranum, Epsomienſe, quæ cum aqueo vehiculo ad aliquot drachmas exhibita fere acidularum virtutem in alvo cienda æmulantur. Neque hoc loco silentio prætermittenda sunt quædam insipida, quæ licet nullum eminentem saporem præseferant, intra primam tamen regionem assumpta laxandi vim exerunt satis conspicuam; ut sunt magnesia, nitrum, & ex mineralibus mercurius dulcis. De his vero notatu dignum est, quod non nisi cum salibus primis in viis combinata operentur. Magnesia enim, quæ nihil aliud, quam flos calcis vivæ est, tum demum alvinas excretiones promovet, quando in primis viis acidum offendit, cui associatum in sal transit amaricans, quod intestinorum fibras irritando sedes satis interdum copiosas excitat. Neque mercurius suum

in

in ducenda alvo officium præstat, nisi in ventriculi vel intestinorum canale iunctus fuerit cum salinis humoribus, quorum conjunctione quædam laxandi vis ipsi conciliatur, ita, ut nunquam solus, sed cum aliis laxativis mixtus exhiberi debeat.

§. XXVI.

Transeundum nunc est ad purgantia, quæ principio agunt vehementiori, sale nimirum caustico inflammatorio, cujus vi superfluas serositates ex habitu corporis & vasis interioribus per glandulas intestinales potenter & copiose evacuant. Inesse autem tale salcausticum inflammatorium vehementioribus ac drasticis illis purgantibus, vel exinde colligere licet, quia externe cuti applicata illam in vesicas attollunt, interne autem paulo largiori dosi exhibita ventriculum & intestina in gravissimas inflammationes conjiciunt, & quidem iisdem cum symptomatibus, quæ venena intra corpus assumpta comitari solent. Neque eorum noxa aliis remediis averti potest, quam iis, quibus venenorum vis frangitur, nimirum oleosis, pinguibus & incrassantibus, quæ sal illud acre drasticum obtundunt, attemperant, & constrictas partes emolliunt. Est vero hoc sal causticum acre vel purum & sibi relictum, quali præcipue granatilli & semina cataputiæ suam operationem exercent: vel cum aliis particulis temperatioribus commixtum. Ita enim sal hoc deleterium immersum conspicitur partibus resinosis in mechoacanna & jalappa: gummeis ac sulphureis impurioribus in scammonio, gummi guttæ, esula, elaterio: amaricantibus in colocynthide, terrestrioribus in utroque helleboro; adeo, ut ex varia hujus caustici salis cum heterogeneis parti-

partibus commixtione diversus purgantium effectus fit derivandus. Prostant verò ex purgantibus plura in officinis composita & præparata, inter quæ tamen veluti de meliori nota commendari merentur extractum panchymagogum *Crollii*, (quod omnibus præferendum est) extracta colocynthidis, elaterii, esulæ, diagrydium cydoniatum purgans, pulvis comitis de Warwick, resina jalappæ, de cujus usu illud tenere oportet, quod non facile in pulvere præscribenda sit, sed potius in liquore, qui commodissime in pilularem formam redigitur. Quod si non observatur, resinofum hoc principium in spissum coagulum abit, quod intestinorum tunicis diu infixum hæret, iisque gravissimas sæpe inducit convulsiones.

§. XXVII.

Deducit nos ordo rei ad diaphoretica, quæ non sine ratione universalia & polychresta remedia appellari merentur, siquidem universam sanguinis & humorum massam expurgant, & sordes in iis collectas per cutaneam difflationem eliminant. Ex pathologicis enim satis abundeque perspectum est, plurimos morbos a prohibita transpiratione suam trahere originem, quia illa excretio, quæ per summam cutim fit, omnes reliquas vincit, quæ per diversa corporis emunctoria celebrantur. Sunt vero diversa principia, quibus hujus generis remedia suam in movenda diaphoresi operationem perficiunt. Quædam enim gaudent principio terreo leniter constringente, quo laxatam fibrarum compagem firmanant, & ad intensiorem motum impellunt. Quorum in numero continentur antimonium diaphoreticum, cinnabaris antimonii, anti-

tihecti-

tihecticum *Poterii*, cerussa, bezoardicum minerale, sudoriferum *Fabri*, regulus antimonii medicinalis, mercurius diaphoreticus solaris, flores sulphuris. Ex animalium regno eodem agendi principio pollent lapides cancerorum, lapis bezoar orientalis & occidentalis, cornu cervi & ebur philosophice præparatum, unicornu fossile: ex compositis lapis de Goa, pulvis Anglicanus, pulvis bezoardicus Pannonicus ruber, pulvis bezoardicus *Sennerti*, *Ludovici*, species de hyacintho; ex radicibus radix contrajervæ, quorum omnium in provocanda transpiratione magna & excellens est efficacia. Deinde agunt nonnulla ex diaphoreticis principio subtili acido cum volatili oleoso mixto, quali instructa sunt acetum vini cum cancerorum lapidibus mixtum, aqua prophylactica *Sylvii*, mixtura simplex acida bezoardica, tinctura bezoardica *Michaelis*, liquor bezoardicus *Bussii* cum liquore nostro anodyno mixtus. Hæc liquida & temperata diaphoretica in febribus præcipue acutis & malignis præstantissimi usus sunt, quoniam sanguinem non adeo vehementer exagitant, sed mitiori saltem commotione impeditam transpirationem præstant liberiores.

§. XXVIII.

Plane autem contrario modo illa operantur diaphoretica, quæ prædita sunt principio sulphureo ac sedativo, quo spasmis constricta cutis colatoria blande relaxant, & largiorem sanguinis affluxum efficiunt. Et huc referri debent omnia theriacalia, theriaca vetus, theriaca cœlestis, aqua theriacalis, diascordium *Fracastorii*; ex mineralibus nitrum, spiritus nitri & vitrioli rite dulcificati; ex vegetabilibus crocus, aqua florum sambu-

E

ci,

ci, roob sambuci, & ex floribus parata essentia. Notandum vero hoc loco est, quod hujus generis diaphoretica insigni cum fructu adhiberi possint in iis affectibus, ubi fibræ spasmō constrictæ sunt, neutiquam vero in iis, ubi fibræ atonia laborant, motusque vitales tardius procedunt. Denique etiam diaphoreticis merito accensenda sunt infusa calida cum aqua parata, quorum expansivus calor sanguinis circuitum augendo transpirationem egregie juvat. Acuitur autem aquarum virtus, si iis infunduntur varii generis herbæ ac flores diaphoretici, ut sunt flores sambuci, rorismarini, herba scordii, veronicæ, cardui benedicti, scabiosæ, quorum virtus in passionibus tam tardis quam acutis satis spectata est.

§. XXIX.

Diaphoreticis proxime subjungenda veniunt sudorifera, quæ ab illis saltem in eo differunt, quod fortiori stimulo instructa motum humorum auctiorem reddant, & sanguine ad habitum corporis externum propulso, serum ex tubulis cutaneis proliciant. Horum autem agendi modus valde diversus est, cujus respectu etiam in varias classes disponi possunt. Primo enim quædam ex sudoriferis operationem suam absolunt sale acri sulphureo, quo fibrosas partes ad majorem motum exstimulant, cujusmodi sunt omnes sic dictæ radices & herbæ alexipharmacæ, ut radix pimpinellæ, anthoræ, angelicæ, levistici, ostrucei, petasitidis, imperatoriæ, helenii, valerianæ, vincetoxici, carolinæ, ex herbis scordium, ruta, carduus benedictus, alliacea. Hæc veteribus audiebant alexipharmaca, eam maxime ob rationem, quia iis magnam & peculiarem

vene-

venenis resistendi virtutem tribuebant. Sed, ut nostram hac de re sententiam ingenue profiteamur, hujus notæ remedia haud quaquam sic comparata sunt, ut tam speciosum nomen sustinere possint. Quæ enim ipsis in veneno expellendo virtus adscribitur, ea profecto exigua valdeque inermis est, ita, ut potius corpori a venenis præservando, quam illis exturbandis interserviant.

§. XXX.

Deinde peculiarem classem ea constituunt sudorifera, quorum virtus a sale quodam volatili oleoso empyreumatico deducenda est. Atque huc spectant varii generis salia volatilia, spiritus, & olea ex animantium partibus parata, ut spiritus & sal volatile cornu cervi, spiritus & sal volatile eboris, spiritus & sal volatile viperarum, mandibularum lucii piscis, lumbricorum terrestrium, tinctura sudorifera ex oleo cornu cervi foetido in rectificato spiritu vini soluto parata, & spiritus noster eboris balsamicus. Alia rursus ex sudoriferis sale agunt subtili ac resinoso, quo imprægnata sunt ex lignis lignum guajaci, santalum citrinum, ex corticibus cortex sassafras, guajaci, chacharillæ; ex radicibus radix ligni Rhodii, zedoariæ, contrajervæ, serpentariæ, lappati acuti, ex quibus famosa illa decocta parantur, quæ in debellanda lue venerea, inque salina humorum impuritate edulcoranda opem prorsus divinam ferunt. Neque vero hoc loco ea reticenda sunt sudorifera, quorum operandi modus a sale acido cum oleo empyreumatico mixto dependet, cujus participes sunt spiritus tartari simplex & volatilis, spiritus succini, spiritus lignorum, spiritus mannæ, spiritus corti-

corticis betulæ, qui omnes acidum subtile cum oleo empyreumatico sibi admixtum habent, & ex horum facto per digestionem connubio rubrum colorem induunt. Pertinent huc etiam tinctura coralliorum cum modo recensitis spiritibus parata, tinctura bezoardica *Michaelis* simplex & volatilis, spiritus *Bussi*, elixir antipestilentiale *Crollii*, essentia pimpinellæ cum essentia scordii mixta, & omnes essentiæ alexipharmacæ, ut spiritus cornu cervi succinatus, spiritus cornu cervi cum spiritu vini & oleo essentificatus, camphora, essentia lignorum cum spiritu tartari volatili parata, elixir camphoratum, ex spiritu vini camphorato & croco compositum & pulvis noster bezoardicus cum nitro & camphora mixtus. Sunt etiam nonnulla ex sudoriferis, quorum virtus maxime in sale nitroso acris sulphureo sita est, quo præcipue foeta sunt excrementa animalium, ut sunt sterces vaccinum, equinum & paratæ ex eo aquæ, sterces ovillum, quod solutum fortissimum expellens constituit; urina quoque vaccarum, quæ sudorem & urinam potenter movet.

§. XXXI.

Præterea dantur quædam sudorifera, quæ humido & vaporoso principio sudorem provocant, dum nimirum secretorios cutis tubulos aperiendo & nimis constrictos emolliendo efficiunt, ut sanguis ad laxata emunctoria accedere, ibique serositates fecerni possint. Et hæc magis externe adhibentur, ut sunt balnea laconica, fœtus & infessus in aquis calidis, cataplasmata ex speciebus alexipharmacis, & aromaticis cum fermento panis, aceto & spiritu vini camphorato parata, & calide regioni umbilicali applicata. Certe mirum

mirum est, quam insigniter hæc externe adhibita sudorifera interne assumptorum virtutem augeant. Frustra enim ad sudorem proliciendum interna adhibentur remedia, quæ sanguinem & humores graviter commovent, nisi pori cutis patuli atque aperti sint, id quod maxime in acutis morbis, in quibus exterior corporis cortex spasmis constringitur, summa circumspeditione observandum est. Si secus fit, tunc hæc remedia sub externo corporis habitu constricto propinata non modo medentis expectationem eludunt, sed etiam internum calorem augendo malum exacerbant, & ægrum in gravissimas sæpe passiones conjiciunt. Cæterum in genere circa horum remediorum usum illud notandum est, quod eorum operatio feliciter succedat, si in vehiculo calido, & cum sufficiente humido, aut etiam in lecto vel hypocausto temperate calido assumantur.

§. XXXII.

Versata est hætenus nostra tractatio circa illud genus remediorum, quæ sudori ciendo dicata sunt, & quorum usus sese latissime extendit; siquidem ex horum classe varia alexipharmaca, antiscorbutica, anti-venerea, & sanguinem depurantia depromi possunt. Jam nos ad sui considerationem vocant diuretica, quæ salinas ferositates per tubulos renales evacuant. Quamvis autem omnia ea remedia, quæ viscidos & tenaces humores incidunt, obstructions reserant, & jam supra sub aperientium classe recensita fuerunt, vim quoque diureticam obtineant; præter illa tamen supersunt quædam paulo specialiora, quæ renale colatorium vel stimulando vel relaxando urinæ fluxum singulariter

juvant. Operantur vero diuretica duplici modo; vel enim renales tubulos vellicando efficiunt, ut copiosior in iis urinosi humoris fiat secretio; vel vasculosam renum compagem laxando, majorem sanguinis & humorum copiam ad illos invitant. Quod modum priorem attinet, præstant hoc primo ea, quæ fale subtilissimo acido imbuta sunt, quo inter alia pollent tinctura aperitiva *Moebii*, spiritus aperitivus *Penoti*, spiritus tartari acidus, vinum Mosellanum, Rhenanum, spiritus formicarum acidus, &, qui instar omnium est, spiritus salis, præsertim ad methodum *Glauberi* ex fale communi & oleo vitrioli præparatus. Hic principio constat tenuissimo volatili sulphureo acri, quo se non modo in tubulos urinales insinuat, sed etiam ad asperam arteriam transit, eamque sæpius ad tussim molestat sollicitat.

§. XXXIII.

Vel operantur diuretica principio quodā alcalino fixiori caustico, quo secretionem urinæ promptiorem reddunt. Hujus generis sunt corallia usta, conchæ ustæ, pulvis *Volckameri*, ex lapidibus pretiosis paratus, cochleæ ustæ, magnesia, tinctura calcis vivæ, tinctura salis tartari, tinctura antimonii acris, liquor filicum *Glauberi*. Vel etiam fale neutro agunt, quod secum foveant terra foliata tartari, solutio oculorum cancri, liquor nephriticus ex spiritu salis & lapidibus ustis paratus, sal Epsomienfe, salia fontium medicatorum, nitrum antimoniatum, arcanum duplicatum. Quædam vero fale constant acerrimo volatili caustico, quo imprægnata sunt ex vegetabilibus omnes allii ac ceparum species, ex animali regno millepedes, vermes majales, cantharides

rides earumque essentia, bufones exsiccati, pulvis viperarum, aranearum, scorpionum. Hæc accerrimo & caustico sale imbuta diuretica vehementissime agunt, & magnam in medendo cautionem requirunt. Facile enim renali substantiæ labem affricant, tenuissimos tubulos discindendo, ex quo fit, ut calculus ex stagnante terrestri ac tartarea materia facillime progeneretur. Cavendum quoque sedulo ac diligenter est, ne fortissima hæc diuretica in renum exulceratione adhibeantur. Tantum enim abest, ut illam aliquantum levent, ut potius multo reddant graviores.

§. XXXIV.

Post hæc diuretica, quæ principio salino acri stimulante urinam cient, proximum locum tenent ea, quæ renale viscus a tono suo dejectum roborando, urinosi liquoris secretionem insigniter promovent. Faciunt huc primo omnia terebinthinata, ut terebinthina Veneta, terebinthina cocta, vel in spiritu vini rectificata soluta, item spiritus & oleum terebinthinæ: deinde juniperina, ut baccae, roob & oleum juniperi; tum etiam succinata, ut succinum in substantia, sal, spiritus & essentia succini. Neque alia ratione operantur ea, quæ principiū resinofum balsamicū obtinent, ut sunt ex herbis petroselinum, hederæ terrestris, cherefolium, ex radicibus radix eryngii; ex seminibus semen apii, anisi, fœniculi, fructus alkekengi, cynosbati, ex corticibus cortex ligni sassafras, ex resinis mastiche, ex balsamis balsamus de Peru & Copaiva. Hæc simplicia satis fortem diuresin movent, ideoque cavendum, ne corporibus succo & sanguine plenis, & ubi humores ad turgescientiam inclinant, exhibeantur. Alias enim facile

facile contingit, ut, si incaute usurpentur, periculosas stagnationes & inflammationes renibus inducant. Accedit, quod non tanta iis insit efficacia calculum jam præsentem expellendi, quam quidem vulgo existimatur; siquidem potius præservationi a calculo inserviunt, dum scilicet urinam frequentius movendo impediunt, quo minus stagnans sabulosa materia in calculosum concretum abire queat. In hac denique diureticorum classe merito etiam ea reponi debent, quæ principio constant balsamico terreo fixiori, & vulgo vulneraria audiunt, e. g. virga aurea, equisetum, hederæ terrestris, consolida saracenia, veronica, cortex & radix acaciæ, semen lycopodii, fructus cynosbati, nuclei dactylorum, quorum omnium magna & spectata vis est in sanandis diuturnis renum læsionibus; siquidem non modo renum atoniam tollunt, sed eosdem etiam ulcere exesos vel acutiori calculo laceratos consolidant, & ad pristinam integritatem reducunt.

§. XXXV.

Longe autem alia ratione operantur, quæ tubulos renales spasmò constrictos relaxando, urinosi humoris affluxum liberiores reddunt. Et hoc præstant principio quodam leni nitroso ac permulcente anodyno, cujus generis sunt nitrum omniaque nitrosa, lac & ferum lactis, semina quatuor frigida majora, amygdalæ dulces & amaræ earumque olea, succus betulæ, succus fragorum, crocus, pulveres ex seminibus malvæ, saxifragiæ, milii solis, lycopodii, violarum parati, & omnia denique refrigerantia & anodyna, quæ spasticas partium internarum constrictiones tollunt. Frequenter enim evenire solet, ut non nisi parcum fiat urinae profluvium.

fluvium, si nimirum graviores dolores ac spasmi partes internas torquent, & simul per consensum viscus renale corripunt, unde accidit, quod serum valde aquosum & pauca saltem in quantitate tubulos renales transeat. Quo in casu omnia calida & acriora diuretica, quæ sanguinem & humores in vehementiorem motum abripiunt, non sine insigni noxa adhibentur. Tutio-rem vero hic faciunt medicinam, quæ dolores demulcent, fibras spasmò constrictas blande relaxant, & hac ratione secretionem urinæ præstant liberio-rem.

§. XXXIV.

Deveniendum jam nobis est ad expectorantia, quæ viscidos ac tenaces humores ex bronchiis pulmonum mediante tussi ejiciunt. Horum operandi modus, ut generatim loquamur, a principio mere salino dependet, quo nervosas trachæ tunicas irritando tussim provocant. Est vero salinum hoc principium vel acre sulphureum, quale reperitur in extracto tabaci, in gummi ammoniaco, gummi benzoe, balsamo Peruviano, radice ari & iridis Florentinæ: vel particulis mucilaginosi immersum, ut in floribus violarum, earumque syrupo, in croco, in radice glycyrrhizæ ejusque essentia & extracto: vel denique cum subtili acido mixtum, cui præcipue suas vires debent spiritus salis dulcis, spiritus asthmaticus *Michaelis*, spiritus tartari, gummi ammoniaci, myrrhæ, acetum squilliticum, acetum destillatum cum cancrorum lapidibus mixtum, quæ pituitosi humoris expectorationem in asthmate suffocativo, inque reliquis pectoris affectibus, ubi pulmonum vascula crasso & glutinoso humore infarcta sunt, egregie

egregie juvant. Abstinendum tamen ab iis est, si falsi acres & nondum cocti humores pectus obsident, qui siccam tussim proritant, & respirationem difficilem reddunt. Nihil enim magis dispositionem ad phthisin & pectoris morbos corpori inducit, quam imprudens & inconsiderator expectorantium usus; quippe quæ sanguinem & humores magno cum impetu & larga in quantitate ad pulmones impellunt, unde graves decubitus vasorumque obstructions oriuntur.

§. XXXVII.

Properamus nunc ad illa remedia, quæ mucosam materiam ex narium tunicis, vel cum sternutatione vel sine ea eliciunt, quorum illa sternutatoria, hæc errhina appellari solent. Sternutatoria ipsam duram matrem afficiunt eam irritando & convellendo, ipsumque pectus simul in consensum trahunt; quod maxime efficiunt principio subtili acri caustico, quale obtinent helleborus albus, helleborus niger, euphorbium; in quibusdam tamen acre hoc sal minus causticum, sed magis temperatum reperitur, ut in pulvere majoranæ, pulvere florum liliorum convallium. Mitius agunt errhina, quæ subtili acri salino stimulo collectas in narium tunicis mucositates leniter educunt, cujusmodi sunt herba betonica, origani, thymi, satirejæ, ex gummatibus benzoe, ejusque flores, gummi guajacum, resina guajaci, rasura ligni aloes, caryophylli, & varia ex aromatibus parata olea; ex radicibus pulvis betæ rubræ, flores rosarum, flores tunicæ, & maxime omnium variæ species tabaci. Ex mineralibus denique huc spectat vitriolum album, quod in aqua majoranæ probe dilutum & postea naribus ad aliquot grana attractum mucositates potenter educit.

§. XXXIIX.

Reliquum est, ut etiam salivantium principia modumq; agendi inquiramus. Operantur hæc subtili stimulo salino minerali, quo glandulas salivales & vasa lymphatica paulo acrius stringunt, & ad majorem salivalis lymphæ secretionem adhortantur. Atque in his principem locum tenent mercurialia, ut mercurius dulcis, mercurius præcipitatus albus, arcanum corallinum, turpethum minerale, flores mercurii *Unzeri*. Mitiores vero indolem induunt mercurialia, quando cum sulphure minerali combinantur, quo pertinent ex cinabarinis cinabaris vulgaris nativa, cinabaris antimonii, æthiops mineralis, mercurius dulcis cum floribus sulphuris mixtus, ex antimonialibus eminent tinctura antimonii tartarifata, tinctura antimonii secundum *Basilium Valentinum* parata, it. panacea *Glauberiana*, sulphur auratum, sulphur auratum martiale, & mercurius noster diaphoreticus fixus. Hæc remedia magni usus sunt in sananda lue venerea, siquidem lympham leniter commovent, & obstructions expediunt. Neque facile in refractori dosi adhibita salivam cient, sed potius diaphoresin procurant, eorumque operatio felicius succedit, si cum decoctis lignorum sudoriferis temperatioribus propinantur. Ex quibus jam dictis & in medium adductis clarissime apparere arbitror, omnes, cujuscunque etiam generis fuerint, remediorum vires, facultates & modum operandi principiis & causis manifestis, sensibus & rationi obviis, physico-mechanicis superstructa esse & ad eas classes optime reduci posse, quibus causæ, quæ morbos inferunt, & naturalem corporis statum perturbant, continentur.

Nouveau Favori d'Esculape
Agréez que mon Apollon
Vous prodigue, au sacré vallon,
Un encens dont l'odeur par ma veine s'échape.

Trouvez bon, di-je, que je louë
Ce Grand art cêt art tout divin
Qui vous rend savant Medecin
Lors qu'Esculape même en ce point là m'avouë.

Je fai, que dans de longs voïages,
Pour savoir le court & le long
D'un art qu'il faut savoir à fond ;
Vous avez consulté les Docteurs les plus sages.

Que, dans le cours de vos études
En plus d'une Vniuersité,
Vos plus grands travaux ont été
De percer le cahos de tant d'incertitudes,

Qu'aulieu de forcer la nature
Par des remedes violens,
Comme font mille Charlatans,
Vous l'aidez, par vôtre art, à bien faire sa cure.

Que, pour savoir la chirurgie,
Vous en avez long tems appris
Au grand Hotel Dieu de Paris
La meilleure pratique avec la theorie,

Enfin vôtre brillant merite
Dans l'art de guerir de Galien
Va vous faire gagner du bien,
Et puis, dans l'art d'aimer, une aimable carite.

JAKVES MASSOT.

